



Broj: 01-02-1-2529/17  
Sarajevo, 26. 10. 2017.

БОСНА И ХЕРЦЕГОВИНА  
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ  
САРАЈЕВО

PRIMLJENO: 26-10-2017			
Organizaciona jedinica	Klasifikaciona oznaka	Redni broj	Broj priloga

ZASTUPNIKU  
U ZASTUPNIČKOM DOMU  
PARLAMENTARNE SKUPŠTINE  
BOSNE I HERCEGOVINE

**Predmet: Prijedlog zakona o dopunama Zakona o sportu u Bosni i Hercegovini, predlagatelj zastupnik Mirsad Donlagić, dostavlja se**

Sukladno Odluci Kolegija Zastupničkog doma Parlamentarne skupštine Bosne i Hercegovine s 32.sjednice, održane 14. lipnja 2016., u privitku Vam dostavljam Prijedlog zakona o dopunama Zakona o sportu u Bosni i Hercegovini, čiji je predlagatelj zastupnik Mirsad Donlagić, koji je Odjel za lektoriranje Tajništva Parlamentarne skupštine Bosne i Hercegovine lektorirao na bosanski, hrvatski i srpski jezik.

S poštovanjem,

ТАЈНИК  
ZASTUPNIČKOG DOMA  
Marin Vukoja

Dostaviti:

- naslovu
- a/a

## Prijedlog

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na . sjednici Predstavničkog doma, održanoj . .2017. godine, i na . sjednici Doma naroda, održanoj . .2017. godine, usvojila je

### ZAKON O DOPUNAMA ZAKONA O SPORTU U BOSNI I HERCEGOVINI

#### Član 1.

U Zakonu o sportu u Bosni i Hercegovini („Službeni glasnik BiH“, br. 27/08, 102/09 i 66/16) u članu 66. (Finansiranje javnog interesa Bosne i Hercegovine) iza prvog stava dodaju se novi st. (2) i (3) koji glase:

„(2) Sredstva iz budžeta institucija Bosne i Hercegovine dodjeljuju se tako što Ministarstvo civilnih poslova BiH alocira sredstva isključivo državnim savezima i uspješnim takmičarima u pojedinačnim sportovima koji zadovoljavaju kriterije predviđene ovim zakonom i Strategijom.

(3) Entitetske vlade, kantonalne institucije i institucije općinskih i gradskih nivoa vlasti nadležne za sufinansiranje sporta omogućavaju sufinansiranje sporta na svim nivoima organiziranja, u skladu s ovim zakonom i Strategijom.“

Ispred prvog stava dodaje se oznaka stava „(1)“.

#### Član 2.

U članu 68. (Olakšice za ulagače sredstava za razvoj sporta) iza prvog stava dodaje se novi stav (2) koji glasi:

„(2) Pravnim i fizičkim licima koja sufinansiraju takmičarski proces državnim reprezentacijama, sportskim kolektivima i pojedincima koji učestvuju u sportskim takmičenjima u zemlji i inozemstvu uložena sredstva priznaju se kao trošak i oslobođena su poreza.“

Ispred prvog stava dodaje se oznaka stava „(1)“.

#### Član 3.

##### (Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku BiH“.

Predsjedavajući  
Predstavničkog doma  
Parlamentarne skupštine BiH

Predsjedavajući  
Doma naroda  
Parlamentarne skupštine BiH

## **O B R A Z L O Ž E N J E**

### **I. USTAVNI OSNOV**

Ustavni osnov za usvajanje Prijedloga zakona o dopunama Zakona o sportu u Bosni i Hercegovini sadržan je u odredbi IV. 4. a) Ustava BiH po kojem je Parlamentarna skupština BiH nadležna za donošenje zakona koji su potrebni za provođenje odluka Predsjedništva BiH ili za izvršenje funkcija Parlamentarne skupštine BiH prema Ustavu BiH.

### **II. RAZLOZI ZA DONOŠENJE ZAKONA**

Sport, općenito, smatra se jednom od najvažnijih aktivnosti u kojoj mladi ljudi, privreda, pa u konačnici i država, na najefikasniji i najjednostavniji način zadovoljavaju svoje potrebe za stvaranjem pretpostavki za zdrav način življenja, promociju privrednih aktivnosti kao i afirmaciju društvenog stepena razvoja.

No, u Bosni i Hercegovini sport je na marginama. Nema ni obaveze ni mogućnosti sufinansiranja sporta, kao ni poreskih olakšica za one koji svojom finansijskom podrškom omogućuju kvalitetan pristup razvoju i zadovoljenju svojih elementarnih potreba putem sporta. Na taj način se u potpunosti zanemaruju stvarne mogućnosti sporta i mladih koji, u traženju boljih uslova, u zabrinjavajućim razmjerama napuštaju Bosnu i Hercegovinu.

Mnogi savezi funkcioniraju na granici mogućeg i vrlo često na granici između zakonskog i protuzakornog.

Također, brojni savezi su blokirani i pod poreskim opterećenjima zbog nejasnih zakonskih odredbi ili zbog pogrešne primjene zakonskih odredbi, što dodatno usložnjava situaciju u funkcioniranju sportskih saveza kao i takmičara u pojedinačnim disciplinama.

Pod pretpostavkom da su savezi organizirani u skladu sa zakonskim odredbama, a bez dovoljne finansijske podrške njihovo funkcioniranje svedeno je u nezamislive okvire koji se karakteriziraju kao uslovi za opstanak - a ne za razvoj i ostvarivanje njihove uloge, dok istovremeno svi oni koji su napustili Bosnu i Hercegovinu i nastupaju za reprezentacije u regionu, prije svega, postižu natprosječne rezultate.

Predloženim dopunama utvrđuju se obaveze Ministarstva civilnih poslova BiH u finansiranju državnih reprezentacija i uspješnih pojedinaca, dok se potrebe nižeg stepena organiziranja - poput klubova ili bilo kojeg načina organiziranja kolektiva i pojedinaca - usmjeravaju na sufinansiranje drugih nivoa institucionalnih nadležnosti. Naravno, ovim nivoima ostavljene su mogućnosti da, kao i do sada, u skladu sa svojim mogućnostima i potrebama, sufinansiraju aktivnosti državnih reprezentacija i uspješnih pojedinaca.

### **III. PRINCIPI NA KOJIMA JE ZAKON ZASNOVAN**

Prijedlog zakona zasnovan je na principu pravilne raspodjele novčanih sredstava, te principu jednakog pristupa sredstvima za sufinansiranje i očuvanje dosadašnjeg nivoa razvoja.

### **IV. FINANSIJSKA SREDSTVA POTREBNA ZA PROVOĐENJE ZAKONA**

Za provođenje ovog zakona nisu potrebna dodatna finansijska sredstva u budžetu institucija BiH i međunarodnih obaveza BiH, već je riječ o preraspodjeli, odnosno boljoj preraspodjeli i pomoći u finansiranju iz postojećih sredstava.

## **ODREDBE KOJE SE DOPUNJAVAJU**

### **Član 66.**

#### **(Finansiranje javnog interesa Bosne i Hercegovine)**

Javni interes u sportu u Bosni i Hercegovini ostvaruje se sufinansiranjem iz sredstava budžeta institucija Bosne i Hercegovine na osnovu Strategije, dugoročnih i godišnjih programa razvoja sporta u Bosni i Hercegovini.

### **Član 68.**

#### **(Olakšice za ulagače sredstava za razvoj sporta)**

Zakonima Bosne i Hercegovine iz oblasti poreske politike, pravnim i fizičkim licima koja ulažu sredstva u razvoj sporta uložena sredstva priznaju se kao troškovi i oslobođena su poreza.